



URED ZA REVIZIJU INSTITUCIJA BIH
КАНЦЕЛАРИЈА ЗА РЕВИЗИЈУ ИНСТИТУЦИЈА БИХ
AUDIT OFFICE OF THE INSTITUTIONS OF BOSNIA AND HERZEGOVINA

www.revizija.gov.ba



IZVJEŠTAJ O OBAVLJENOJ FINANSIJSKOJ REVIZIJI

PARLAMENTARNE SKUPŠTINE BOSNE I HERCEGOVINE ZA 2023. GODINU

Sarajevo, juni 2024. godine



Sadržaj

I	MIŠLJENJE NEZAVISNOG REVIZORA.....	2
1.	MIŠLJENJE O FINANSIJSKIM IZVJEŠTAJIMA	2
2.	MIŠLJENJE O USKLAĐENOSTI.....	4
II	KRITERIJI KORIŠTENI U REVIZIJI.....	6
III	PREPORUKE ZA 2023. GODINU	7
IV	IZVJEŠTAJ O OBAVLJENOJ REVIZIJI.....	8
1.	PREDMET I CILJ REVIZIJE.....	8
2.	OCJENA REALIZACIJE PREPORUKA IZ PRETHODNIH IZVJEŠTAJA	8
3.	DJELOKRUG, ORGANIZACIJA I RUKOVOĐENJE	10
4.	SISTEM INTERNIH KONTROLA.....	10
5.	BUDŽET PARLAMENTARNE SKUPŠTINE ZA 2023. GODINU	11
6.	FINANSIJSKI IZVJEŠTAJI.....	12
6.1.	Pregled rashoda i izdataka iz budžeta	12
6.1.1.	Izdaci za upotrebu vozila.....	12
6.1.2.	Usluge reprezentacije.....	13
6.2.	Pregled prihoda i primitaka	14
6.3.	Bilans stanja	14
6.3.1.	Obaveze	14
7.	ZAPOŠLJAVANJE I STATUS ZAPOSLENIH (ANGAŽOVANIH) OSOBA	14
8.	JAVNE NABAVKE	15
8.1.	Nabavka službenih vozila	15
9.	OSTALO	16
9.1.	Sredstva za finansiranje političkih stranaka	16
10.	KOMENTARI NA NACRT IZVJEŠTAJA	18
PRILOZI	18

I MIŠLJENJE NEZAVISNOG REVIZORA

Mišljenje nezavisnog revizora se daje na osnovu obavljene finansijske revizije koja obuhvata reviziju finansijskih izvještaja i, u vezi s istom, reviziju usklađenosti aktivnosti, finansijskih transakcija i informacija s relevantnim zakonima i drugim propisima.

1. MIŠLJENJE O FINANSIJSKIM IZVJEŠTAJIMA

Mišljenje

Obavili smo reviziju finansijskih izvještaja **Parlamentarne skupštine Bosne i Hercegovine** (u daljem tekstu: Parlamentarna skupština) koji obuhvataju: bilans stanja na 31.12.2023. godine, pregled prihoda, primitaka i finansiranja po ekonomskim kategorijama, pregled rashoda i izdataka po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava, pregled kapitalnih ulaganja po vrstama i projektima, pregled doznaka iz tekuće rezerve budžeta, te analizu iskaza - tekstualni dio, za godinu koja završava na taj dan.

Prema našem mišljenju, finansijski izvještaji Parlamentarne skupštine prikazuju istinito i fer, u svim značajnim aspektima, finansijsko stanje imovine, obaveza i izvora sredstava na 31.12.2023. godine, te prihode i izvršenje budžeta za godinu koja se završava na navedeni datum, u skladu s primjenjivim okvirom finansijskog izvještavanja.

Osnova za mišljenje

Reviziju smo obavili u skladu sa Zakonom o reviziji institucija Bosne i Hercegovine¹ i Međunarodnim standardima vrhovnih revizionih institucija (ISSAI)². Naše odgovornosti prema ISSAI standardima su detaljnije opisane u odjeljku *Odgovornosti revizora za reviziju finansijskih izvještaja*.

Nezavisni smo od Parlamentarne skupštine u skladu s etičkim zahtjevima koji su relevantni za našu reviziju prema ISSAI 130 - Etički kodeks i ispunili smo ostale etičke odgovornosti u skladu s tim zahtjevima.

Vjerujemo da su revizionih dokazi koje smo pribavili dovoljni i odgovarajući da osiguraju osnovu za naše mišljenje.

Odgovornosti rukovodstva za finansijske izvještaje

Rukovodstvo Parlamentarne skupštine je odgovorno za sastavljanje i fer prezentaciju finansijskih izvještaja u skladu s primjenjivim okvirom finansijskog izvještavanja na nivou institucija Bosne i Hercegovine tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu s računovodstvenim politikama i procedurama za korisnike budžeta institucija BiH. Ova odgovornost podrazumijeva

¹ Službeni glasnik BiH, broj 12/06

² Međunarodni standardi vrhovnih revizionih institucija (ISSAI) dio su Okvira profesionalnih objava Međunarodne organizacije vrhovnih revizionih institucija – IFPP okvira (INTOSAI Framework of Professional Pronouncements), koji čine tri nivoa objava: INTOSAI principi (INTOSAI-P), međunarodni standardi vrhovnih revizionih institucija (ISSAI) i INTOSAI smjernice (GUID).

i kreiranje, primjenu i održavanje internih kontrola koje su relevantne za sastavljanje i prezentaciju finansijskih izvještaja koji ne sadrže značajne pogrešne iskaze uslijed prijevare ili greške, odgovarajuća objelodanjivanja relevantnih informacija u napomenama uz finansijske izvještaje, kao i odabir i primjenu odgovarajućih računovodstvenih politika i računovodstvenih procjena, koje su razumne u datim okolnostima.

Odgovornosti revizora za reviziju finansijskih izvještaja

Naši ciljevi su steći razumno uvjerenje o tome da li su finansijski izvještaji kao cjelina sačinjeni bez značajnog pogrešnog prikazivanja uslijed prijevare ili greške i izdati izvještaj nezavisnog revizora koji uključuje naše mišljenje. Razumno uvjerenje je visok nivo uvjerenja, ali nije garancija da će revizija obavljena u skladu s Međunarodnim standardima vrhovnih revizionih institucija uvijek otkriti značajno pogrešno prikazivanje kada ono postoji. Pogrešni prikazi mogu nastati uslijed prijevare ili greške i smatraju se značajnim ako se razumno može očekivati da, pojedinačno ili zbirno, utiču na ekonomske odluke korisnika donijete na osnovu tih finansijskih izvještaja.

Kao sastavni dio revizije, u skladu s Međunarodnim standardima vrhovnih revizionih institucija, stvaramo profesionalne procjene i održavamo profesionalni skepticizam tokom revizije. Mi također:

- Prepoznamo i procjenjujemo rizike značajnog pogrešnog prikazivanja finansijskih izvještaja, zbog prijevare ili greške, oblikujemo i obavljamo revizione postupke kao reakciju na te rizike i pribavljamo revizione dokaze koji su dovoljni i primjereni da osiguraju osnovu za naše mišljenje. Rizik neotkrivanja značajnog pogrešnog prikazivanja nastalog uslijed prijevare je veći od rizika nastalog uslijed greške, jer prijevare može uključiti tajne sporazume, krivotvorenje, namjerno izostavljanje, pogrešno prikazivanje ili zaobilaženje internih kontrola.
- Stičemo razumijevanje internih kontrola relevantnih za reviziju kako bismo oblikovali revizione postupke koji su primjereni u datim okolnostima, ali ne i za svrhu izražavanja mišljenja o uspješnosti internih kontrola.
- Ocjenjujemo primjerenost korištenih računovodstvenih politika i razumnost računovodstvenih procjena i povezanih objava koje je stvorilo rukovodstvo.
- Ocjenjujemo cjelokupnu prezentaciju, strukturu i sadržaj finansijskih izvještaja, uključujući i objave, kao i da li finansijski izvještaji odražavaju transakcije i događaje na kojima su zasnovani na način kojim se postiže fer prezentacija.

S rukovodstvom komuniciramo u vezi sa, između ostalih pitanja, planiranim djelokrugom i vremenskim rasporedom revizije i važnim nalazima revizije, uključujući i one koji se odnose na značajne nedostatke u internim kontrolama koji su otkriveni tokom naše revizije.

2. MIŠLJENJE O USKLAĐENOSTI

Mišljenje

U vezi s revizijom finansijskih izvještaja Parlamentarne skupštine za 2023. godinu, obavili smo i reviziju usklađenosti aktivnosti, finansijskih transakcija i informacija s relevantnim zakonima i drugim propisima.

Prema našem mišljenju, aktivnosti, finansijske transakcije i informacije Parlamentarne skupštine za 2023. godinu u skladu su, u svim značajnim aspektima, sa zakonima i drugim propisima koji su definisani kao kriteriji za datu reviziju.

Osnova za mišljenje

Reviziju usklađenosti smo obavili u skladu sa Zakonom o reviziji institucija Bosne i Hercegovine i ISSAI 4000 - Standard za reviziju usklađenosti. Naše odgovornosti prema ovom standardu su detaljnije opisane u odjeljku *Odgovornosti revizora za reviziju usklađenosti*.

Nezavisni smo od Parlamentarne skupštine u skladu s etičkim zahtjevima koji su relevantni za našu reviziju prema ISSAI 130 - Etički kodeks i ispunili smo ostale etičke odgovornosti u skladu s tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

Skretanje pažnje³

Ne izražavajući rezervu na mišljenje o usklađenosti, skrećemo pažnju na sljedeće:

- *Nedostaci i slabosti u procesu javnih nabavki (tačka 8.1. Izvještaja).*
- *Nedostaci i slabosti internih kontrola vezano za dosljednu primjenu internih akata koji se odnose na finansiranje političkih stranaka te transparentnost i namjensku potrošnju budžetskih sredstava za finansiranje političkih stranaka (tačka 9.1. Izvještaja).*

Odgovornosti rukovodstva za usklađenost

Pored odgovornosti za sastavljanje i fer prezentaciju finansijskih izvještaja, rukovodstvo Parlamentarne skupštine je također odgovorno da osigura da su aktivnosti, finansijske transakcije i informacije u skladu s propisima kojima su regulisane i potvrđuje da je tokom fiskalne godine osiguralo namjensko, svrsishodno i zakonito korištenje raspoloživih sredstava za ostvarivanje utvrđenih ciljeva, te ekonomično, efikasno i efektivno funkcionisanje sistema finansijskog upravljanja i kontrole.

Odgovornosti revizora za reviziju usklađenosti

Pored odgovornosti da izrazimo mišljenje o finansijskim izvještajima, naša odgovornost podrazumijeva i izražavanje mišljenja o tome da li su aktivnosti, finansijske transakcije i

³ Odjeljak kojim revizor skreće pažnju korisnicima izvještaja na pitanja koja su prezentovana ili objelodanjena u informacijama vezanim za predmet revizije, a koja su, prema revizorovoj profesionalnoj prosudbi, jako važna za razumijevanje takvih informacija od strane korisnika izvještaja; u revizionoj praksi ovaj odjeljak se naziva još i 'isticanje pitanja'.



informacije, u svim značajnim aspektima, u skladu sa zakonima i drugim propisima kojima su regulisane. Odgovornost revizora uključuje obavljanje procedura, kako bi pribavili revizione dokaze o tome da li se sredstva koriste za odgovarajuće namjene i da li je poslovanje Parlamentarne skupštine, prema definisanim kriterijima, usklađeno s relevantnim zakonima i drugim propisima. Procedure podrazumijevaju procjenu rizika od značajnih neusklađenosti sa zakonima i propisima koji regulišu poslovanje subjekta revizije. Također, naša odgovornost podrazumijeva i ocjenu finansijskog upravljanja, funkcije interne revizije i sistema internih kontrola.

Sarajevo, 26.6.2024. godine

GENERALNI REVIZOR

Hrvoje Tvrtković, v. r.

**ZAMJENIK
GENERALNOG REVIZORA**

Nedžad Hajtić, v. r.

**ZAMJENICA
GENERALNOG REVIZORA**

Neda Močević, v. r.

II KRITERIJI KORIŠTENI U REVIZIJI

Ured za reviziju institucija Bosne i Hercegovine (u daljem tekstu: Ured za reviziju) obavio je reviziju finansijskih izvještaja i, u vezi s istom, reviziju usklađenosti. Revizija finansijskih izvještaja i revizija usklađenosti podrazumijevaju proces objektivnog prikupljanja i procjenjivanja dokaza, kako bi se utvrdilo da li su predmeti revizije, tj. finansijski izvještaji, kao i aktivnosti, finansijske transakcije i informacije, usklađeni s odgovarajućim kriterijima koji su sadržani u zakonima i drugim propisima. Kriteriji predstavljaju uporedne parametre koji se koriste kako bi se dala ocjena predmeta revizije.

Za obavljanje finansijske revizije korišteni su sljedeći kriteriji:

- Zakon o budžetu institucija BiH i međunarodnih obaveza BiH za 2023. godinu
- Zakon o finansiranju institucija BiH
 - Pravilnik o računovodstvu s računovodstvenim politikama i procedurama za korisnike budžeta institucija BiH
 - Pravilnik o finansijskom izvještavanju institucija BiH
 - Instrukcija o privremenom finansiranju institucija BiH za period januar - mart 2023. godine
- Zakon o plaćama i naknadama u institucijama BiH i podzakonski akti
- Zakon o porezu na dohodak i Zakon o doprinosima (FBiH i RS)
- Zakon o javnim nabavkama i podzakonski akti
- Zakon o državnoj službi u institucijama BiH i podzakonski akti
- Zakon o radu u institucijama BiH i podzakonski akti
- Zakon o upravi i podzakonski akti
- Zakon o reviziji institucija BiH
- Zakon o obligacionim odnosima (dio koji se odnosi na ugovore o djelu)
- Zakon o finansiranju političkih stranaka
- Zakon o internoj reviziji.

III PREPORUKE ZA 2023. GODINU

U Izvještaju o obavljenoj finansijskoj reviziji za 2023. godinu dato je sedam preporuka (dvije nove i pet ponovljenih) i sve se odnose na usklađenost.

Osim navedenog, u 2023. godini su obrađene dvije preporuke koje su u prethodnom periodu ocijenjene kao preporuke čija je realizacija u toku i koje su i dalje predmetom praćenja u pogledu njihove realizacije⁴.

U tabeli koja slijedi prikazan je rezime datih preporuka dok su detaljni nalazi prezentovani po procesima u okviru pojedinačnih tačaka Izvještaja.

Tabela 1. Rezime datih preporuka

Br. prep.	Tekst preporuke	Status preporuke
1	Parlamentarna skupština treba preduzeti aktivnosti na uspostavljanju sveobuhvatnog sistema finansijskog upravljanja i kontrole u skladu s važećom zakonskom regulativom.	P
2	Potrebno je unaprijediti interne evidencije o korištenju službenih vozila u pogledu dosljednog, tačnog i potpunog popunjavanja putnih naloga te ažurnog vođenja istih.	P
3	Parlamentarna skupština treba pratiti realizaciju ugovora, odnosno osigurati dosljednu primjenu ugovornih odredbi.	P
4	Potrebno je osigurati da obrazloženja nastanka troška reprezentacije budu sačinjena u skladu sa internim pravilima kako bi se nedvosmisleno mogla potvrditi opravdanost nastalih troškova.	P
5	Parlamentarna skupština je dužna tendersku dokumentaciju kreirati na način da ista bude zasnovana na pravičnosti i jednakom tretmanu prema potencijalnim ponuđačima, uz obavezno poštivanje principa transparentnosti.	N
6	Parlamentarna skupština je dužna evaluaciju ponuda vršiti u skladu sa zahtjevima definisanim u tenderskoj dokumentaciji.	N
7	Parlamentarna skupština treba dosljedno primjenjivati vlastitu Odluku o raspodjeli finansijskih sredstava za finansiranje političkih stranaka iz budžeta institucija BiH.	P

Status: N-nova, P-ponovljena⁵

⁴ Vidjeti tačku 2. Izvještaja

⁵ Nerealizovane preporuke iz prethodnog perioda su, nakon utvrđenog činjeničnog stanja, ponovljene.

IV IZVJEŠTAJ O OBAVLJENOJ REVIZIJI

1. PREDMET I CILJ REVIZIJE

Predmet revizije su finansijski izvještaji Parlamentarne skupštine za 2023. godinu i usklađenost aktivnosti, finansijskih transakcija i informacija s relevantnim zakonima i drugim propisima.

Cilj je da se izrazi mišljenje o tome jesu li finansijski izvještaji pouzdani i odražavaju li bilansi u cijelosti rezultate poslovanja. Također, cilj revizije je procijeniti primjenjuje li rukovodstvo institucije zakone i propise i koristi li sredstva za odgovarajuće namjene, te ocijeniti finansijsko upravljanje, sistem internih kontrola i funkciju interne revizije.

S obzirom na to da se revizija obavlja ispitivanjem na bazi uzorka i da postoje inherentna ograničenja u računovodstvenom sistemu i sistemu internih kontrola, pojedine materijalno značajne greške mogu ostati neotkrivene.

2. OCJENA REALIZACIJE PREPORUKA IZ PRETHODNIH IZVJEŠTAJA

U prethodnom Izvještaju o obavljenoj finansijskoj reviziji Parlamentarne skupštine (za 2022. godinu) Ured za reviziju izrazio je mišljenja i to:

- pozitivno mišljenje o finansijskim izvještajima i
- pozitivno mišljenje o usklađenosti sa skretanjem pažnje na:
 - *Slabosti i nedostaci internih kontrola vezano za dosljednu primjenu internih akata te transparentnost i namjensku potrošnju budžetskih sredstava za finansiranje političkih stranaka.*

U Izvještaju za 2022. godinu su date preporuke u cilju otklanjanja uočenih nepravilnosti, nedostataka i slabosti. Preporuke iz izvještaja prethodnih godina (dvije preporuke) čija je realizacija bila u toku nisu ponovljene u Izvještaju za 2022. godinu, ali se njihova realizacija, kao i realizacija preporuka koje nisu mogle biti ocijenjene, kontinuirano prati. Utvrdili smo da je Parlamentarna skupština u 2023. godini od ukupno 16 prethodno datih preporuka, realizovala sedam, za dvije preporuke je realizacija u toku, pet preporuka nije realizovala, jedna preporuka nije mogla biti ocijenjena i jedna preporuka je ocijenjena kao nerelevantna za dalje praćenje.

U narednoj tabeli prikazan je pregled ocjene realizacije prethodno datih preporuka.

Tabela 2. Detaljan pregled ocjene realizacije preporuka datih u 2022. godini

Br. prep.	Preporuke iz izvještaja za 2022. godinu	Status
1	Parlamentarna skupština nije u 2023. godini preduzimala aktivnosti na uspostavljanju sveobuhvatnog sistema finansijskog upravljanja i kontrole kako bi isti uskladila sa važećom zakonskom regulativom.	
2	S obzirom da realizacija preporuke vezane za posebnu budžetsku alokaciju sredstava namijenjenih za rad interne revizije zavisi od tehničkih mogućnosti modula Glavne knjige trezora te da je potrebno sistemsko rješenje od strane Ministarstva finansija i trezora BiH za sve institucije koje imaju internu reviziju, preporuka nije relevantna za dalje praćenje.	

Br. prep.	Preporuke iz izvještaja za 2022. godinu	Status
3	Parlamentarna skupština je u skladu sa Pravilnikom o finansijskom izvještavanju institucija BiH objavila godišnje finansijske izvještaje na svojoj web-stranici.	✔
4	Parlamentarna skupština je u 2023. godini podnijela zahtjev za refundaciju bolovanja nadležnim fondovima zdravstvenog osiguranja.	✔
5	Zajednička komisija za administrativne poslove je početkom 2024. godine donijela Odluku o izmjeni i dopuni Odluke o načinu obračuna plaća i ostalih prava poslanika i delegata u Parlamentarnoj skupštini kojom je definisana evidencija prisustva na poslu za poslanike i delegate.	●
6	Interne evidencije korištenja službenih vozila još uvijek nisu unaprijeđene niti su svi putni nalozi za vozila popunjeni na način kako je to propisani internim pravilnikom.	✘
7	Fakture za održavanje vozila nisu ispostavljene po ugovorenim cijenama odnosno nije osigurana dosljedna primjena ugovornih odredbi.	✘
8	Obrazloženja nastanka troškova reprezentacije nisu sačinjena u skladu sa internim pravilnikom o reprezentaciji.	✘
9	Sredstva u pripremi koja se odnose na adaptaciju zgrade i trga ispred Parlamentarne skupštine su u 2023. godini isknjižena iz poslovnih knjiga Parlamentarne skupštine.	✔
10	Potraživanja po osnovu pogrešne uplate sredstava političkim strankama su naplaćena u 2023. godini.	✔
11	Provođene su aktivnosti na isplati zaostalih doprinosa iz ranijih godina, odnosno dio obaveza je u 2023. godini izmiren i evidentiran u poslovnim knjigama.	●
12	Parlamentarna skupština je u tekućoj godini evidentirala kratkoročna razgraničenja u skladu sa Uputstvom za unos i evidentiranje obveza u ISFU sistem koje su planirane u budžetu tekuće fiskalne godine, a čiji će računi ili konačne situacije biti ispostavljeni u narednoj fiskalnoj godini.	✔
13	Parlamentarna skupština je zapošljavanje u 2023. godini vršila u skladu sa Zakonom o radu u institucijama BiH.	✔
14	Jedinica za internu reviziju Sekretarijata Parlamentarne skupštine još uvijek ne vrši kontrolu namenskog korištenja sredstava za finansiranje političkih stranaka iz budžeta institucija BiH niti je pri izradi projekcije budžeta Parlamentarne skupštine sektor za finansije u saradnji sa klubovima i nezavisnim kandidatima uradio projekciju raspodjele sredstava po potrebama.	✘

Tabela 2a. Detaljan pregled ocjene realizacije preporuka datih u ranijim godinama

Br. prep.	Preporuke iz prethodnih izvještaja	Status
4/2021	U 2023. godini nisu uočene nepravilnosti vezane za isplatu naknade za prijevoz na posao i sa posla.	✔
11/2020	S obzirom da isplata otpremnina i ponovno aktiviranje radnopravnog statusa nije precizno definisano važećom zakonskom regulativom niti internim aktima Parlamentarne skupštine, da je bilo pokušaja u ranijem periodu, ali ne i konkretnih izmjena regulative po ovom pitanju u 2023. godini, preporuka nije mogla biti ocijenjena	Ⓜ

Status: ✔ realizovana preporuka⁶, ● preporuka čija je realizacija u toku⁷, ✘ nerealizovana preporuka⁸, Ⓜ preporuka koja nije mogla biti ocijenjena u revidiranom periodu ili nije relevantna za dalje praćenje⁹.

⁶ Realizovane su aktivnosti navedene u preporuci.

⁷ U toku je realizacija aktivnosti, te stoga u ovom Izvještaju nije data nova preporuka, ali je dat opis stanja i provedenih aktivnosti.

⁸ Nisu preduzimate aktivnosti na realizaciji preporuke, te je stoga u ovom Izvještaju ponovljena preporuka za predmetni proces.

⁹ Preporuka nije mogla biti ocijenjena u ovom ciklusu revizije, ali će biti ocijenjena kad se za to steknu uslovi ili nije relevantna za dalje praćenje jer realizacija ne zavisi od institucije.

3. DJELOKRUG, ORGANIZACIJA I RUKOVOĐENJE

Parlamentarna skupština osnovana je Ustavom Bosne i Hercegovine kao najviše zakonodavno tijelo Bosne i Hercegovine, a sastoji se od Predstavničkog doma i Doma naroda. Sve zakonodavne odluke donose se u oba doma Parlamentarne skupštine. Parlamentarna skupština donosi zakone, odobrava budžet i odlučuje o izvorima i iznosu prihoda za finansiranje institucija Bosne i Hercegovine i međunarodnih obaveza Bosne i Hercegovine, potvrđuje imenovanje predsjedavajućeg i članova Vijeća ministara, daje saglasnost za ratifikaciju međunarodnih ugovora i odlučuje o drugim pitanjima neophodnim za provođenje njenih ovlaštenja ili dodijeljenih sporazumom entiteta.

Operativnim radom Parlamentarne skupštine upravlja Sekretarijat Parlamentarne skupštine tj. kolegij Sekretarijata, kojeg čine: sekretar Predstavničkog doma, sekretar Doma naroda i sekretar Zajedničke službe.

Odlukom o organizaciji Sekretarijata Parlamentarne skupštine¹⁰ definisani su poslovi i zadaci Sekretarijata Parlamentarne skupštine. Sekretarijat obavlja stručne, administrativno-tehničke, organizacijske, finansijske, informativne, konsultantske i druge poslove za potrebe Parlamentarne skupštine. Za svoj rad Sekretarijat odgovara Predstavničkom domu i Domu naroda Parlamentarne skupštine. Kolegij Sekretarijata organizuje i osigurava zakonito i efikasno obavljanje poslova, donosi propise za koje je zakonom ovlašten, uz pismenu saglasnost Zajedničke komisije za administrativne poslove te u skladu sa zakonom i podzakonskim aktima odlučuje o pravima, obavezama i odgovornostima zaposlenih u Sekretarijatu.

Sekretar Predstavničkog doma imenovan je 23.2.2023. godine, sekretar Doma naroda 02.03.2023. godine, dok je sekretar Zajedničke službe imenovan 10.7.2020. godine. Iako je Dom naroda 02.03.2023. godine podržao ponovno imenovanje dosadašnjeg sekretara Zajedničke službe, Predstavnički dom Parlamentarne skupštine još uvijek nije usvojio Prijedlog odluke o imenovanju istog.

4. SISTEM INTERNIH KONTROLA

Parlamentarna skupština je odgovorna za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usklađenost poslovanja sa zakonima i drugim propisima.

Finansijsko upravljanje i kontrola

Parlamentarna skupština je sačinila osnovne dokumente potrebne za uspostavu sistema finansijskog upravljanja i kontrole, postupajući u skladu sa Zakonom o finansiranju institucija BiH, Priručnikom za finansijsko upravljanje i kontrolu i Smjernicama za provođenje procesa upravljanja rizicima u institucijama BiH.

Parlamentarna skupština još uvijek nije ažurirala pravilnik o unutrašnjoj organizaciji, odnosno nije definisala opise poslova rukovodilaca Parlamentarne skupštine na svim nivoima na način da se utvrde njihove obaveze za uspostavu i razvoj sistema finansijskog upravljanja i kontrole i upravljanja rizicima iz njihove nadležnosti. Nije uspostavljen registar rizika u PIFC aplikaciji u

¹⁰ Službeni glasnik BiH, broj 92/05 i 63/08.

skladu sa Smjernicama za upravljanje rizicima u institucijama BiH niti su ključni poslovni procesi unutar organizacionih jedinica dokumentovani u PIFC aplikaciji. Također, nisu realizovane mjere planirane za razvoj sistema finansijskog upravljanja i kontrole na osnovu prošlogodišnje samoprocjene niti je donesen operativni godišnji plan aktivnosti za uspostavljanje i razvoj sistema finansijskog upravljanja i kontrole.

Godišnji izvještaj o finansijskom upravljanju i kontroli za 2023. godinu je sačinjen i dostavljen Centralnoj harmonizacijskoj jedinici Ministarstva finansija i trezora Bosne i Hercegovine¹¹.

PREPORUKA 1

Parlamentarna skupština treba preduzeti aktivnosti na uspostavljanju sveobuhvatnog sistema finansijskog upravljanja i kontrole u skladu sa važećom zakonskom regulativom.

Funkcionisanje sistema internih kontrola:

Na osnovu provedene revizije smo utvrdili da sistem internih kontrola u Parlamentarnoj skupštini, generalno gledano, nije na zadovoljavajućem nivou. Naime, nedostaci i slabosti su konstatovani u pojedinim segmentima poslovanja (izdaci za upotrebu vozila, usluge reprezentacije, javne nabavke i finansiranje političkih stranaka) što je detaljno opisano u pojedinačnim tačkama Izvještaja. Za unapređenje procesa smo dali odgovarajuće preporuke, a Parlamentarna skupština je dužna uložiti dodatne napore kako bi se iste realizovale.

5. BUDŽET PARLAMENTARNE SKUPŠTINE ZA 2023. GODINU

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2023. godinu¹², Parlamentarnoj skupštini su odobrena sredstva u ukupnom iznosu od 22.757.000 KM (tekući izdaci 21.970.000 KM i kapitalni izdaci 787.000 KM)¹³.

Tokom godine izvršeno je usklađivanje budžeta koje se odnosi na sredstva višegodišnjeg kapitalnog ulaganja prenesena iz prethodne godine u iznosu od 1.003.622 KM, primitke po osnovu prodaje vozila u iznosu od 17.780 KM i prihode od naplate premije osiguranja u iznosu od 59.241 KM.

Prema navedenom, Parlamentarna skupština je u 2023. godini raspolagala sredstvima u ukupnom iznosu od 23.837.643 KM.

Parlamentarna skupština je izvršila prestrukturisanje rashoda budžeta u ukupnom iznosu od 137.000 KM, koje je odobrilo Ministarstvo finansija i trezora BiH.

¹¹ Navedena Jedinica ima obavezu sačinjavati i Vijeću ministara BiH dostavljati konsolidovani godišnji izvještaj o sistemu finansijskog upravljanja i kontrole u institucijama BiH koji sadrži informacije o stepenu uspostavljanja, napretku, stanju i aktivnostima koje su u izvještajnom periodu realizovane u oblasti razvoja sistema internih finansijskih kontrola, kao i o planovima za budući razvoj sistema internih finansijskih kontrola u institucijama BiH.

¹² Službeni glasnik BiH, broj 22/23

¹³ Do usvajanja budžeta za 2023. godinu, Parlamentarna skupština je raspolagala sredstvima odobrenim prema Instrukciji o privremenom finansiranju institucija BiH za period januar - mart 2023. godine, broj: 05-16-2-8338-2/22 od 28.12.2022. godine, koju je donio ministar finansija i trezora Bosne i Hercegovine.

6. FINANSIJSKI IZVJEŠTAJI

Parlamentarna skupština je sačinila Godišnji finansijski izvještaj za 2023. godinu i dostavila ga nadležnim organima i institucijama u skladu s važećim propisima i u utvrđenom roku. Analizom bilješki uz finansijske izvještaje konstatovano je da su iste sačinjene u skladu sa Pravilnikom o finansijskom izvještavanju institucija BiH.

6.1. Pregled rashoda i izdataka iz budžeta

U pregledu rashoda i izdataka po ekonomskim kategorijama-zbirno, u periodu od 1.1. do 31.12.2023. godine, ukupno ostvareni rashodi iskazani su u iznosu od 19.786.375 KM, što je za 4.051.268 KM manje u odnosu na raspoloživi (korigovani) budžet za 2023. godinu.

Vrijednosno značajni rashodi odnose se na: bruto plaće (13.291.005 KM), naknade troškova zaposlenih (2.432.244 KM), putne troškove (1.092.676 KM), ugovorene usluge (2.065.834 KM), nabavku opreme (354.813 KM) i nabavku ostalih stalnih sredstava (169.403 KM).

Pregled rashoda i izdataka iz budžeta prikazan je u Tabeli I u prilogu Izvještaja.

6.1.1. Izdaci za upotrebu vozila

Ukupni izdaci za službena vozila sa 31.12.2023. godine iznose 177.581 KM, a značajniji izdaci odnose se na gorivo (84.129 KM), materijal i usluge opravki i održavanja vozila (58.215 KM) i auto-gume (17.280 KM).

Internim pravilnicima¹⁴ o korištenju službenih vozila, propisan je način korištenja službenih vozila u Parlamentarnoj skupštini, kao i prava i obaveze vozača u vezi sa korištenjem te korištenje privatnog vozila u službene svrhe. Članovi kolegija oba doma i članovi kolegija Sekretarijata imaju pravo na stalno korištenje službenog vozila sa vozačem radi obavljanja poslova i zadataka iz nadležnosti Parlamentarne skupštine. Zaključno sa 31.12.2023. godine Parlamentarna skupština BiH je imala na raspolaganju 16 vozila.

Internim pravilnikom je definisano da se za korištenje službenog vozila upotrebljava propisani obrazac putnog naloga za putničko motorno vozilo. Putni nalog za vozilo se izdaje za tekući mjesec za svako službeno vozilo pojedinačno i popunjava ga lice koje upravlja vozilom sa svim podacima te odgovara za njihovu istinitost i tačnost. Definisano je i mjesečno vođenje evidencije potrošnje goriva, tekućeg održavanja i nabavke auto-guma za svako vozilo.

Kontrolom naloga za službena vozila konstatovali smo da se odredbe internog pravilnika koje se odnose na popunjavanje naloga za vozila ne poštuju u potpunosti. Naime, kod pojedinih putnih naloga nisu upisani svi podaci poput relacije kretanja (upisana samo početna i krajnja kilometraža), stanja kilometraže te ovjere ponuđača prilikom točenja goriva. Evidentirane su veće relacije u odnosu na stvarne udaljenosti, kao i loko vožnja preko 90 kilometara bez adekvatnog obrazloženja, zbog čega se nismo mogli uvjeriti u pouzdanost internih evidencija

¹⁴ Pravilnik o korištenju službenih vozila Parlamentarne skupštine BiH broj: 03/5-02-4-2421-1/16 od 30.05.2017. godine, Pravilnik o izmjenama i dopunama Pravilnika o korištenju službenih vozila Parlamentarne skupštine BiH broj: 03/5-02-4-2650-3/17 od 03.09.2018. godine i Pravilnik o dopunama Pravilnika o korištenju službenih vozila Parlamentarne skupštine BiH broj: 03/5-02-4-1258/23 od 07.06.2023. godine.

o korištenju službenih vozila. Navedeno može uticati na povećan rizik nenamjenske upotrebe vozila.

PREPORUKA 2

Potrebno je unaprijediti interne evidencije o korištenju službenih vozila u pogledu dosljednog, tačnog i potpunog popunjavanja putnih naloga te ažurnog vođenja istih.

Nadalje, na pojedinim fakturama za održavanje vozila uočili smo da se fakturisane cijene razlikuju od ugovorenih, iako je u okvirnom sporazumu definisano da se pružalac usluge obavezuje na nepromjenjivost cijena iz ponude tokom cijelog ugovornog perioda.

PREPORUKA 3

Parlamentarna skupština treba pratiti realizaciju ugovora, odnosno osigurati dosljednu primjenu ugovornih odredbi.

6.1.2. Usluge reprezentacije

Izdaci po osnovu usluge reprezentacije sa 31.12.2023. godine ostvareni su u iznosu od 132.951 KM.

Pravilnikom o reprezentaciji¹⁵ regulisano je pravo na korištenje sredstava za reprezentaciju, vrste reprezentacije, lica sa pravom korištenja sredstava za reprezentaciju, maksimalni iznos sredstava za reprezentaciju, kao i obaveza ovlaštenih lica u vezi sa korištenjem sredstava za reprezentaciju. Pravo na korištenje reprezentacije imaju: član kolegija doma Parlamentarne skupštine, predsjedavajući komisije doma, odnosno zajedničke komisije oba doma Parlamentarne skupštine, parlamentarni vojni povjerenik i član kolegija Sekretarijata Parlamentarne skupštine. Pravilnikom je definisano da dokumentacija za pravdanje troškova sadrži račun, fiskalni račun, naznaku učesnika i kratku potpisanu izjavu o održanom sastanku/radnom ručku ili večeri.

Kao i prethodnih godina uočili smo da na pojedinim fakturama interne i eksterne reprezentacije nisu naznačeni učesnici niti su navedena adekvatna obrazloženja povoda nastanka troška, što nije u skladu sa internim pravilnikom.

PREPORUKA 4

Potrebno je osigurati da obrazloženja nastanka troška reprezentacije budu sačinjena u skladu sa internim pravilima kako bi se nedvosmisleno mogla potvrditi opravdanost nastalih troškova.

¹⁵ Pravilnik o reprezentaciji u Parlamentarnoj skupštini BiH broj: 03-02-4-2422/16 od 08.03.2017. godine, Pravilnik o izmjenama Pravilnika o reprezentaciji u Parlamentarnoj skupštini BiH broj: 03/5-02-4-1133/20 od 09.06.2020. godine i broj: 03/5-02-4-1259/23 od 07.06.2023. godine.

6.2. Pregled prihoda i primitaka

Ukupno ostvareni prihodi i primici po ekonomskim kategorijama u periodu od 1.1. do 31.12.2023. godine, iskazani su u iznosu od 111.073 KM. Prihodi i primici se odnose na prihode od naplate premija osiguranja (59.241 KM), ostale prihode (34.052 KM) i primitke od prodaje vozila (17.780 KM).

Pregled prihoda i primitaka prikazan je u Tabeli III u prilogu Izvještaja.

6.3. Bilans stanja

U bilansu stanja na 31.12.2023. godine iskazana su ukupna sredstva u iznosu od 950.038 KM. Ukupne obaveze sa izvorima sredstava iskazane su u iznosu od 3.290.405 KM.

Značajne stavke bilansa stanja odnose se na neotpisanu vrijednost stalnih sredstava (950.038 KM), obaveze prema dobavljačima (440.581 KM), obaveze prema zaposlenima (1.438.117 KM) i kratkoročna razgraničenja (461.669 KM).

Bilans stanja prikazan je u Tabeli II u prilogu Izvještaja.

6.3.1. Obaveze

Zakonom o plaćama i naknadama u institucijama BiH definisano je da se obračun poreza i doprinosa na ukupna primanja zaposlenih u institucijama BiH vrši primjenom zakonskih propisa prema mjestu prebivališta zaposlenog. Navedena odredba se na identičan način primjenjuje i na primanja članova upravnih, nadzornih i drugih radnih tijela iz nadležnosti institucija BiH.

Parlamentarna skupština je za članove Odbora za žalbe građana na rad policijskih službenika za period od 28.07.2009. do 31.12.2012. godine evidentirala i izmirivala samo obaveze za porez za ostvarenu naknadu. Nakon pribavljenih mišljenja Ministarstva finansija RS i Poreske uprave RS utvrđeno je da naknade isplaćene imenovanoj osobi imaju karakter ličnih primanja. Na osnovu navedenog, Parlamentarna skupština je u tekućoj godini evidentirala i izmirila dio obaveza na osnovu doprinosa na lična primanja iz ranijeg perioda u ukupnom iznosu od 14.841 KM. Preostalo je još da Parlamentarna skupština izmiri preostale obaveze koje se odnose na jednu imenovanu osobu koja je ostvarila pravo na penziju.

Po pitanju evidentiranja obaveza na osnovu zaostalih doprinosa iz ranijih godina dali smo preporuku u prethodnom periodu (redni broj 11 u Tabeli 2.) te smo na osnovu prezentovanog ocijenili da je realizacija iste u toku, a što će biti predmetom daljeg praćenja do okončanja implementacije.

7. ZAPOŠLJAVANJE I STATUS ZAPOSLENIH (ANGAŽOVANIH) OSOBA

Zakonom o budžetu institucija BiH i međunarodnih obaveza BiH za 2023. godinu odobreno je 245 zaposlenih u Parlamentarnoj skupštini.

Na 31.12.2023. godine bilo je zaposleno 237 osoba, a prosječan broj zaposlenih u 2023. godini za koje su isplaćene bruto plaće bio je 230.

8. JAVNE NABAVKE

Parlamentarna skupština je donijela Plan javnih nabavki za 2023. godinu, kako je propisano Zakonom o javnim nabavkama¹⁶.

Prema prezentovanim podacima¹⁷ Parlamentarna skupština BiH je u 2023. godini provela 13 postupaka javnih nabavki. Od navedenog broja, Parlamentarna skupština je provela šest otvorenih postupaka u vrijednosti od 504.939 KM, šest konkurentskih postupka u vrijednosti od 73.022 KM i jedan postupak u skladu sa Aneksom II u vrijednosti od 85.480 KM. Parlamentarna skupština je putem direktnih sporazuma izvršila nabavke u vrijednosti od 72.024 KM.

Revizijom pojedinačnih procedura javnih nabavki utvrđene su nepravilnosti i nedostaci kako slijedi:

8.1. Nabavka službenih vozila

Nabavka tri službena vozila za potrebe Parlamentarne skupštine provedena je putem otvorenog postupka koji je pokrenut 07.06.2023. godine. Kriterij za dodjelu ugovora bila je najniža cijena. Procijenjena vrijednost nabavke iznosila je 253.864 KM. Prethodno je postupak poništen iz razloga što kod jedine zaprimljene ponude autorizacija generalnog zastupnika nije dostavljena u skladu sa uslovima definisanim tenderskom dokumentacijom. Nije bilo izmjene tenderske dokumentacije u ponovljenom postupku, a tendersku dokumentaciju je preuzelo 14 ponuđača. Ponudu je ponovo dostavio jedan isti ponuđač kao i u prethodnom postupku i ista je ocijenjena kvalifikovanom te je sa izabranim ponuđačem 28.11.2023. godine zaključen ugovor o kupoprodaji u iznosu od 253.385 KM.

Zakonom o javnim nabavkama BiH definisano je da tehničke specifikacije moraju svim kandidatima/ponuđačima omogućiti jednak i nediskriminirajući pristup nadmetanju. Parlamentarna skupština je prije pokretanja procedure javne nabavke izvršila istraživanje tržišta te na osnovu toga sastavila tehničku specifikaciju vozila. U tehničkoj specifikaciji traženih vozila navedeni su pojedini zahtjevi¹⁸ koji u kombinaciji onemogućavaju jednak i nediskriminirajući pristup takmičenju. Nisu nam prezentirane informacije o modelima vozila koji mogu ispuniti tražene karakteristike iz tenderske dokumentacije. Navedeno upućuje na propuste prilikom izrade tehničke specifikacije za predmetnu nabavku

PREPORUKA 5

Parlamentarna skupština je dužna tendersku dokumentaciju kreirati na način da ista bude zasnovana na pravičnosti i jednakom tretmanu prema potencijalnim ponuđačima, uz obavezno poštivanje principa transparentnosti.

¹⁶ Službeni glasnik Bosne i Hercegovine, broj 39/14 i 59/22

¹⁷ Podaci iz tabelarnih pregleda sačinjenih za potrebe revizije.

¹⁸ Dužina minimalno 4800 mm, turbo dizelski motor jačine minimalno 145 kw, pogon na sva četiri točka, 5 vrata, zapremina prtljažnika minimalno 580 litara i dr.

Pored navedenog, Zakonom o javnim nabavkama¹⁹ propisano je da je ugovorni organ dužan odbaciti zahtjev za učešće ili ponudu kada ponuda nije potpuna i ne ispunjava zahtjeve iz tenderske dokumentacije. Uvidom u ponudu konstatovali smo da ponuđena vozila ne ispunjavaju sve zahtjeve koji su naznačeni u tehničkoj specifikaciji traženih vozila²⁰, iako je komisija ponudu ocijenila kao prihvatljivu. S obzirom na navedeno, realizirana je nabavka vozila čije specifikacije ne odgovaraju traženim karakteristikama u tenderskoj dokumentaciji.

PREPORUKA 6

Parlamentarna skupština je dužna evaluaciju ponuda vršiti u skladu sa zahtjevima definisanim u tenderskoj dokumentaciji.

9. OSTALO

9.1. Sredstva za finansiranje političkih stranaka

Na osnovu Zakona o finansiranju političkih stranaka²¹ i Odluke o raspodjeli finansijskih sredstava za finansiranje političkih stranaka iz budžeta institucija BiH²², iz budžeta Parlamentarne skupštine se osiguravaju sredstva za finansiranje političkih stranaka, koalicija političkih stranaka, odnosno klubova delegata i poslanika zastupljenih u Parlamentarnoj skupštini. Sredstva se raspoređuju tako da se 30% sredstava dijeli jednako svim političkim strankama, odnosno koalicijama političkih stranaka koje su osvojile mandate, 60% sredstava prema broju poslaničkih, odnosno delegatskih mandata, koje svaka politička stranka, koalicija političkih stranaka, odnosno nezavisni kandidat ima u trenutku dodjele mandata te 10% od ukupnog iznosa parlamentarnim grupama razmjerno broju poslaničkih, odnosno delegatskih mjesta koja pripadaju manje zastupljenom polu.

Procedurama za primjenu člana 3. Odluke o raspodjeli finansijskih sredstava za finansiranje političkih stranaka iz budžeta institucija BiH detaljnije je regulisana namjena i način trošenja dodijeljenih sredstava. Iako je ovom odlukom predviđeno da kontrolu namjenskog korištenja vrši Jedinica za internu reviziju Sekretarijata Parlamentarne skupštine, ista ni u 2023. godini nije obavila kontrolu.

Također, navedenom Odlukom predviđeno je i da pri izradi projekcije budžeta Parlamentarne skupštine svi klubovi-predsjedavajući klubova, parlamentarne grupe i nezavisni kandidati, u saradnji sa sektorom za finansije urade projekciju raspodjele sredstava po potrebama (za putne troškove, troškove reprezentacije, pružanje stručnih i konsultantskih usluga, troškove sudjelovanja u društveno odgovornim aktivnostima, itd.). Navedena projekcija i plan trošenja sredstava ove godine, kao niti prethodnih godina nisu urađene.

¹⁹ Član 68. stav (4) tačka a).

²⁰ Zapremina prtljažnika ponuđenog vozila je 563 l, a zapremina tražena tehničkom specifikacijom je minimalno 580 l.

²¹ Službeni glasnik BiH, broj 95/12

²² Odluka o raspodjeli finansijskih sredstava za finansiranje političkih stranaka iz budžeta institucija BiH od 30.05.2013. godine

PREPORUKA 7

Parlamentarna skupština treba dosljedno primjenjivati vlastitu Odluku o raspodjeli finansijskih sredstava za finansiranje političkih stranaka iz budžeta institucija BiH.

Za finansiranje političkih stranaka iz budžeta institucija BiH za 2023. godinu ukupno je izdvojeno 950.000 KM, a sa 31.12.2023 utrošeno je 945.249 KM. Iznos od 553.429 KM se odnosi na prijenos sredstava na transakcijske račune centrala političkih stranaka. Detaljan pregled utroška prikazan je u tabeli broj 3.

Tabela 3. Detaljan pregled odobrenih i utrošenih sredstava za finansiranje političkih stranaka

Naziv kluba/stranke	Raspoloživa sredstva	Utrošeno za rad kluba	Preneseno na stranku	Ukupno utrošeno u 2023. godini
PREDSTAVNIČKI DOM				
SDA BIH	113.306	25.501	87.357	87.357
SNSD	96.190	61.669	33.957	95.626
SDS, PDP,SZPR	118.988	45.042	73.572	118.614
HDZ BIH	68.274	47.602	20.357	67.959
NIP	58.274	25.874	31.857	57.731
DF-Željko Komšić	50.357	26.245	24.057	50.302
SDP BIH	83.241	22.927	60.217	83.144
Naša Stranka, BHI	86.548	13.284	73.214	86.498
Srpski klub	60.714	19.993	40.714	60.707
NES	48.274	1.635	46.357	47.992
DOM NARODA				0
Klub delegata Srpskog naroda	57.917	44.578	12.000	56.578
Klub delegata Bošnjačkog naroda	50.000	6.163	43.200	49.363
Klub delegata Hrvatskog naroda	57.917	51.307	6.570	57.877
UKUPNO:	950.000	391.820	553.429	945.249

Internim procedurama Parlamentarne skupštine, nije propisana obaveza dostavljanja dokumentacije kojom bi se potvrdilo namjensko korištenje ovih sredstava te ne možemo potvrditi kako su sredstva utrošena u svrhu za koju su predviđena. Zakonom o finansiranju političkih stranaka definisano je da Centralna izborna komisija BiH pregleda i kontroliše finansijske izvještaje koje podnose političke stranke i obavlja reviziju finansiranja političkih stranaka.



10. KOMENTARI NA NACRT IZVJEŠTAJA

Parlamentarna skupština u ostavljenom roku nije dostavila komentare na Nacrt izvještaja o obavljenoj finansijskoj reviziji za 2023. godinu, tako da ovaj Izvještaj predstavlja konačan izvještaj bez korekcija u odnosu na Nacrt izvještaja o obavljenoj finansijskoj reviziji za 2023. godinu.

Reviziju u Parlamentarnoj skupštini za 2023. godinu obavili su: Enes Alić - vođa tima, Nevena Kenjić - članica tima, Ana Rajić - članica tima i Slaviša Vuković - član tima.

**Vođa tima za
finansijsku reviziju**

Enes Alić, v. r.

**Rukovodilac Odjela za
finansijsku reviziju**

Danijel Jozić, v. r.

**Rukovodilac Odjela za
razvoj, metodologiju i kontrolu
kvaliteta finansijske revizije**

Mirsada Sijamić, v. r.

Broj: 02-16-1-854/24

Prilozi

Tabela I - Pregled rashoda budžeta za 2023. godinu

Tabela II - Bilans stanja na 31.12.2023. godine

Tabela III - Pregled prihoda i primitaka za 2023. godinu

Pregled rashoda budžeta za 2023. godinu

Parlamentarna skupština BiH

Tabela I

Opis	Odobreni budžet	Usklađivanja budžeta	Ukupni budžet	Izvršenje budžeta	Procenat (5/4*100)
1	2	3	4 (2+3)	5	6
1. Tekući izdaci	21.970.000	0	21.970.000	19.262.159	88
Bruto plaće i naknade	15.107.000	0	15.107.000	13.291.005	88
Naknade troškova zaposlenih	2.698.000	0	2.698.000	2.432.244	90
Putni troškovi	1.009.000	120.000	1.129.000	1.092.676	97
Izdaci telefonskih i poštanskih usluga	200.000	0	200.000	93.091	47
Izdaci za energiju i komunalne usluge	0	0	0	0	
Nabavka materijala	115.000	0	115.000	86.321	75
Izdaci za usl. prijevoza i goriva	152.000	0	152.000	87.521	58
Unajmljivanje imovine i opreme	0	0	0	0	
Izdaci za tekuće održavanje	217.000	0	217.000	94.443	44
Izdaci za osiguranje	33.000	0	33.000	19.025	58
Ugovorene i druge posebne usluge	2.439.000	-120.000	2.319.000	2.065.834	89
2. Kapitalni izdaci	587.000	77.021	664.021	524.216	79
Nabavka zemljišta	0	0	0	0	
Nabavka građevina	0	0	0	0	
Nabavka opreme	267.000	94.021	361.021	354.813	98
Nabavka ostalih stalnih sredstava	320.000	-17.000	303.000	169.403	56
Rekonstrukcija i investiciono održavanje			0	0	
3. Tekući grantovi	0	0	0	0	
	0	0	0	0	
	0	0	0	0	
4. Budžet-neposredna potrošnja (1+2+3)	22.557.000	77.021	22.634.021	19.786.375	87
5. Višegodišnja kapitalna ulaganja	200.000	1.003.622	1.203.622	0	0
	0	0	0	0	
6. Novčane donacije	0	0	0	0	
	0	0	0	0	
7. Programi posebne namjene	0	0	0	0	
	0	0	0	0	
8. Ukupno budžet (4+5+6+7)	22.757.000	1.080.643	23.837.643	19.786.375	83

Rukovodstvo je Pregled rashoda budžeta po ekonomskim kategorijama odobrilo 4.3.2024. godine.

SEKRETAR ZAJEDNIČKE SLUŽBE:

Bilans stanja na 31.12.2023. godine

Parlamentarna skupština BiH

Tabela II

Opis	31.12.2023.	31.12.2022.	Procenat (2/3*100)
1	2	3	4
1. Gotovina, krat. potraživanja, razgraničenja i zalihe	0	28.747	0
Novčana sredstva	0	0	
Kratkoročna potraživanja	0	28.747	0
Kratkoročni plasmani	0	0	
Interni finansijski odnosi	0	0	
Zalihe	0	0	
Kratkoročna razgraničenja	0	0	
2. Stalna sredstva	950.038	11.554.968	8
Stalna sredstva	6.957.329	17.531.933	40
Ispravka vrijednosti	6.007.291	5.976.965	101
Neotpisana vrijednost stalnih sredstava	950.038	11.554.968	8
Dugoročni plasmani	0	0	
Dugoročna razgraničenja	0	0	
UKUPNO AKTIVA (1+2)	950.038	11.583.715	8
3. Kratkoročne obaveze i razgraničenja	2.340.367	1.935.278	121
Kratkoročne tekuće obaveze	440.581	347.080	127
Kratkoročni krediti i zajmovi	0	0	
Obaveze prema zaposlenima	1.438.117	1.151.208	125
Interni finansijski odnosi	0	0	
Kratkoročna razgraničenja	461.669	436.990	106
4. Dugoročne obaveze i razgraničenja	0	0	
Dugoročni krediti i zajmovi	0	0	
Ostale dugoročne obaveze	0	0	
Dugoročna razgraničenja	0	0	
5. Izvori sredstava	950.038	11.554.968	8
Izvori sredstava	950.038	11.554.968	8
Ostali izvori sredstava	0	0	
Neraspoređeni višak prihoda/rashoda	0	0	
UKUPNO PASIVA (3+4+5)	3.290.405	13.490.247	24

Napomena: Pravilnikom o finansijskom izvještavanju institucija Bosne i Hercegovine, čl.10. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou Budžeta institucija Bosne i Hercegovine za tekuću godinu biti uravnotežen.

Rukovodstvo je Bilans stanja odobrilo 4.3.2024. godine

SEKRETAR ZAJEDNIČKE SLUŽBE:

Pregled prihoda i primitaka za 2023. godinu

Parlamentarna skupština BiH

Tabela III

Opis	Planirani iznos u budžetu	Izmjene i dopune	Ukupno planirani iznos	Ostvareni iznos	Procenat (5/4*100)
1	2	3	4 (2+3)	5	6
1. Neporezni prihodi	0	0	0	93.293	
Prihodi od poduzetničkih aktivnosti i imovine i prihodi od pozitivnih kursnih razlika	0	0	0	0	
Prihodi od naplate premije osiguranja				59.241	
Ostali prihodi				34.052	
Naknade i takse i prihodi od pružanja javnih usluga	0	0	0	0	
Novčane kazne (neporeske prirode)	0	0	0	0	
2. Tekući transferi i donacije	0	0	0	0	
Primljeni tekući transferi od inostranih vlada i međunarodnih organizacija - donacije iz inostranstva	0	0	0	0	
Primljeni tekući transferi od ostalih nivoa vlasti	0	0	0	0	
Domaće donacije	0	0	0	0	
3. Kapitalni primici	0	0	0	17.780	
Primici od prodaje prometnih vozila	0	0	0	17.780	
Primici od finansijske imovine	0	0	0	0	
Primici od dugoročnog zaduživanja	0	0	0	0	
Primici od kratkoročnog zaduživanja	0	0	0	0	
4. Ukupni prihodi i primici (1+2+3)	0	0	0	111.073	

Rukovodstvo je Pregled prihoda i primitaka po ekonomskim kategorijama odobrilo 4.3.2024. godine

SEKRETAR ZAJEDNIČKE SLUŽBE: